

# Glieud giuvna e midada dal clima

## In gimnasiast declera ses engaschi

DA GUIU SOBIELA-CAANITZ

■ **En ils davos mais èsi vegnì cler che blera gliעד giuvna da differents pajais (passa 125) è vegnida conscienta da la midada dal clima.** Ins sto mo consultar il computer cun chavazzins relativs. «Amnesty International» per exempel infurmescha davart chaumas e manifestaziuns en connex cun la midada dal clima. Sia secziun en Frantscha ha gist publictà la versiun franzosa d'in «billet» dal commember britannic *James Mair*\*. I suonda la quintessenza da lez document en versiun rumantscha.

### Quai è la finamira

«Il zercladur passà a Londra hai occupà la punt da Westminster a pe cun ina gruppa gimnasiasts. Ina femna ravgentada ha sa vilentada: 'Pervia da vus riva memia tard vi da la lavur! Vus na stuais betg ir a lavurar!' Nus havain segir disturbà, ma propi quai era la finamira. Tgi che stueva ir cun il traffic public èn segir rivà tard, ma nus n'avain pli tard ni lieu da lavur ni gnanc in planet saun per viver, sche nosas regenzas na piglian betg subit mesiras cunter la midada dal clima (...). Da matg han in milliun umans giuvens en 1600 citads (...) fatg part da las chaumas da scola per la giustia (...). Occupar las vias e disturbar il traffic, èsi propi la dretga metoda per manar ad ina midada? En mintga cas stimulescha quai a discutir e sforza d'inscriver la midada dal clima en l'agenda politica.

### Cun il telefonin

Nus essan quasi tuts conscients dals resultats catastrofals dal disturbi climatic,

da las sitgiras prolungadas, dals stemprads destructivs, da las chaliras e dals gronds incendis. Ma la midada da clima na disturba betg mo la natira. Ella promova las inegalitads e violescha il dretg da viver saun, da sa nutrir, da duvrar aua euv. (...). La midada dal clima n'è betg mo in problem politic u moral ch'ins dastgia sa prestar d'ignorar. Ella metta en dumonda la survivenza da la carstgaunadad e noss dretgs fundamentals. I para dentant ch'insaquants enclegian quai meglier, cunzunt mia generaziun, la 'Generaziun Z', ils umans tranter set e 22 onns. In bun exempel è *Greta Thunberg* (16 onns) (...): Lezza ha creà in Moviment da la giuventetgna per l'acziun climatica (...). La 'Generaziun Z' dovra la tecnica per sa mobilisar; nus manain il patratg dals giuvens a sa midar. Nus essan creschids, grazia ad Internet, cun l'access immediat a l'infurmaziun. La gliעד giuvna, cun il telefonin, po sa rimnar subit per la chaussa che la stat a cor; cun smatgar in buttun, po'la coordinar acziuns d'insubordinaziun u malobedienscha civila, sco manifestaziuns ed occupaziuns paschaivlas (...). Igl è trist che scholars, gimnasiasts e students duain surpigliar la responsabladad da salvar noss clima dal collaps, ma nus essan pronts da far quai (...). La midada dal clima riguarda mintga uman, cunzunt ils pli giuvens (...). Thunberg di: 'Nus na pudain betg salvar il mund respectond las reglas da gieu, damai ch'ins sto midar lezzas reglas.'»

\*«La génération Z a raison au sujet du changement climatique» (Amnesty International France).